

BANT DI CONCORS **pe** **COMPOSIZION DAL IMNI** **DE PATRIE DAL FRIÛL**

ART. 1. Indizion e principis gjenerâi

1. L'Istitût Ladin Furlan "Pre Checo Placerean", in colaborazion cul Messaggero Veneto-Giornale del Friuli, al bandis un concurs di composizion musicâl pe individuazion dal Imni uficiâl de Patrie dal Friûl.
2. L'Imni al à di riclamâ i caratars principâi e particolârs dal Friûl, in riferiment ae storie, aes tradizions, ae identitât sociâl e linguistiche di dute la comunitât.

ART. 2. Recuisîts

1. Il concurs al è viert a compositôrs di cualsisedi citadinance, etât, ses e residence. No si domande il possès di nissun diplome musicâl o titul ecuiparât.

ART. 3. Composizion musicâl

1. Ogni candidât al pues presentâ dome une composizion originâl, mai publicade, o eseguide o premiade in altris concors musicâi, pene la escluson.
2. La composizion - par corâl e orchestre classiche - e à di vê chestis carateristichis di durade, organic vocâl e strumentâl: **durade:** minime 2 minûts e massime 4 minûts; **organic vocâl:** corâl di feminis e oms, armonizât di dôs a cuatri vôs; **organic strumentâl:** Arcs: violins, violis, violonceli, cuintribàs. Lens: flauts, obois, clarinets, fagots. Otons: cuars, trombis, trombons. Percussions: timpani e percussions variis.
3. La composizion e à di cjapâ drenti ducj i doi i organics, stant che si trate di un imni par corâl e orchestre classiche.

ART. 4. Test

1. Il test dal Imni al à di jessi scrit in lenghe furlane. Al pues jessi originâl o za publicât e/o premiât in concors leteraris precedents. Al pues jessi di autôr anonim, o di autôr cognossût, vivent o no vivent. In ogni câs il test nol pues jessi une traduzion o un adatament di un componiment za esistente in altre lenghe.
2. Il test al à di jessi scrit in lenghe comune e al à di rispjetâ la grafie uficiâl de lenghe furlane (art. 13 de Leç regionâl 15/96).
3. Tal câs che l'autôr dal test al sedi diviers di chel des musiche, a varan di jessi dadis lis liberatoriis, lis manjevis e lis declarazions previodudis dai articui 6 e 9, ancje dal autôr dal test o di chei che a àn titul.
4. L'organizadôr al proviodarà a tradusi il test de opare che e vinçarà ancje in chês altris lenghis dal Friûl, che dutis a varan valôr uficiâl.



ART. 5. Modalitât e tiermin di presentazion de domande

1. Il materiâl al à di rivâ par raccomandade A/R **dentri dai 20 di Zenâr dal 2018** a chest recapit postâl e cun cheste descrizion:

Istitût Ladin Furlan “Pre Checo Placerean”
Concors pal Inmi de Patrie dal Friûl
CP 3 – 33039 SEDEAN (Ud)

2. I elaborâts a varan di rivâ intune buste sigilade, anonime, segnade dome di un sproc, pene la esclusion dal concurs.

3. La buste e varà di contignî, a pene di esclusion:

a) un supuart CD o USB anonim, segnât dome dal sproc sielt, dulà che a varan di jessi cjariâts, in trê cartelis diviersis, chescj file (che a varan di jessi leibii in maniere clare, pene la esclusion dal concurs a judizi no sindicabil de jurie):

(i) La partidure dal imni e il spartît par ogni strument, in formât pdf. Partidure e spartîts a àn di jessi segnâts dome dal sproc sielt, cence nissun riferiment al autôr o ai autôrs de musiche e dal test. Dutis lis pagjinis no varan di jessi plui grandis dal formât A3 (cm 42 X 29,7). No son limitazions su la tipologjie di program di scritture musicâl;

(ii) Un file audio (MIDI) de composizion gjavade fûr dal program di scritture musicâl doprât, ancje chel anonim, segnât dome dal sproc sielt;

(iii) Il test dal imni, in formât pdf, ancje chel anonim, segnât dome dal sproc sielt.

b) Une buste anonime, segnade dome dal sproc sielt, cun dentri:

(i) il model di domande di iscrizion alegât a chest bant, compilât in ogni part e firmât;

(ii) copie dal document di identitât;

(iii) curriculum vitae.

4. No son ametudis modalitâts diviersis di presentazion dai materiâi.

ART. 6. Declarazions

1. Cu la partecipazion a chest concurs i participants a declarin, sot de proprie responsabilitât:

a) di jessi titulârs esclusîfs, o in dut câs sogjets che a àn la plene disponibilitât in vie esclusive di ducj i dirits su la opare proponude, tra l'altri — a titul esemplificatîf e no esaustîf — di chei di proprietât inteletuâl, di autôr e de personalitât;

b) che il materiâl al è originâl e nol conten oparis, materiâi e/o elements di cualsisedi gjenar di titularitât di sogjets tierçs, manjevant e liberant l'Istitût Ladin Furlan “Pre Checo Placerean” di cualsisedi cjame economiche che e ves di nassi tal câs che chest pont nol sedi stât rispjetât.

ART. 7. Jurie

1. Lis composizions rivadis intal rispjet di dutis lis disposizions segnadis in chest bant, a saran giudicadis di une Jurie specializade che e individuvarà il toc vincidôr.

2. La Jurie e sarà nomenade dal organizadôr dopo de scjadince dal tiermin dal articul 5. Cheste e sarà componude di un totâl di 5 esperts intai cjamps de musiche o de lenghe e de storie furlanis, e un di lôr al varà funzions di President, simpri daûr indicazion dal organizadôr.

3. Lis decisions de Jurie no si puedin sindicâ.



ART. 8. Premi

1. Al autôr de opere sielte de Jurie, al vignarà assegnât dal Istitût Ladin Furlan “Pre Checo Placerean” un premi di € 3.000,00 (trê mil/00, al sporc des stratignudis di leç) e une targhe.
2. Tal câs che l'autôr dai tescj al sedi diviers dal autôr des musichis, il premi al sarà dividût mieç parom.
3. Tal câs che nissune opere e sedi ritignude meritevule dal Premi, chest nol sarà assegnât.
4. No je previodude la assegnazion di premis ex aequo o di segnalazions.

ART. 9. Liberatoriis e manjeve

1. Restant fer il dirit ae paternitât des oparis dal inzen previodût de normative sul dirit di autôr, cu la partecipazion a chest concurs il vincidôr o i vincidôrs, tal câs che l'autôr des musichis e l'autôr dai tescj a sedin diviers, a declarin fin di cumò:

- a) di cedi al Istitût Ladin Furlan “Pre Checo Placerean”, ogni dirit patrimoniâl, ancje di proprietât inteletuâl, in perpetui e par dut il mont, relatîf ae opere vincidore. I dirits a cjapin dentri, par altri, ancje la facultât di: (i) riprodusi e fâ la multiplicazion in copiis, in dut e/o in part, in cualsisedi mût e/o forme, cun cualsisedi procediment di riproduzion; (ii) elaborâ o publicâ, in dut e/o in part, il materiâl cun ogni mieç e su cualsisedi supuart; (iii) comunicâ, trasmeti e/o difondi al public il materiâl cun cualsisedi mieç e sisteme atuâl di difusion a distance (tra chescj, a titul esemplificatîf, internet e rêts di telecomunicazions, radio e television, telefonie, e vie indevant) o inventât in avignî, doprant cualsisedi tecnologjie e strument tecnic terrestri o spaziâl di trasmission e ricezion cognossût in dî du vuê, in cualsisedi forme e cun cualsisedi modalitât di acès;
- b) di no pretindi, fale il premi dal articul 8, nissun altri compens pe cession dai dirits specificâts tal pont chi parsore;
- c) di cjapâ at in maniere formâl che il sfrutament efetîf e l'implei dal materiâl al sarà fat a discrezion esclusive dal Istitût Ladin Furlan “Pre Checo Placerean”, che dut câs si impegne a gjestî i dirits dal Imni cence nissun fin di vuadagn;
- d) di manjevâ l'Istitût Ladin Furlan “Pre Checo Placerean”, e chei che a àn cause, di cualsisedi pretese, rivendicazion, contestazion – ancje in sede judiziâl – che e ves di nassi in relacion al sfrutament de opere vincidore.

ART. 10. Acetazion dal bant e riservatece

1. La partecipazion al concurs e compuarte la plene acetazion di chest bant, cjapade dentri la no sindicabilitât dal judizi esprimût de Jurie. Ceste e impliche ancje la autorizazion al organizadôr di conservâ i dâts personâi declarâts, jessint intindût che l'ûs dai stes al è colegât al Premi e aes operations relativis, escludint l'ûs par ogni fin diviers dichel previodût.

ART. 11. Anulament

1. L'organizadôr si riserve di anulâ il concurs a propri judizi no sindicabil, cence che ai participants nol sedi dovût nuie.

ART. 12. Oparis no premiadis

1. I lavôrs, ancje se no premiâts, in plui che in câs di anulament dal concurs, no vignaran tornâts indaûr ai participants.
2. No saran comunicâts i judizis des oparis no premiadis.



ART. 13. Proclamazion dal vincidôr

1. La proclamazion dal vincidôr e sarà fate **ai 3 di Avrîl dal 2018**, te ore e intal lûc che a saran comunicâts al vincidôr cun avîs individuâl.

ART. 14. Disposizions finâls

1. In câs di dubis interpretatîfs, al fâs test il bant originâl dal concurs in lenghe furlane. Par chel che nol è previodût di pueste di chest bant di concurs, a valin lis disposizions dal Codic Civîl e des leçs speciâls in materie, se aplicabilis.